

客家語朗讀文章高中學生組（四縣腔）

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个僵攞手；難得个放棄日，搵在眠床看日頭輕輕仔徒步、聽窗門外背鳥仔聲唧啾，時間乜像恬恬頓腳咧，啊！這靚靚个朝晨。

食過朝，想去遠久無見个朋友。自家駛車仔，時間就在自家个手頭項，做得慢慢仔行、定定仔奈；經過鬧熱个街市，車輪仔慢慢仔轉入鄉道，來到苗栗个穀倉——灣裡。路个兩片，金黃飽米个禾串仔硬硬會對禾田滄出來哩；風吹來，該一陣一陣歡喜到手攘腳踏¹、搖頭扭腰个金黃稻浪，實在還靚。田脣企等兩個在該比手畫腳个阿伯，日頭晟來，笠嫫下晒到烏刻刻仔个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊野野个禾田，直直透到山下；深深淺淺个黃襯等嫩青个田脣、浸青个大樹，就像係天公伯个調色盤，乜係這個豐收个季節正會有个景色。該向有幾坵仔既經收成忒早冬禾，準備愛過時二冬禾个禾田。田水清清清，同朗朗个藍

天、白雲、田脣个樹仔、人家屋，明明明个反映出來，就像係框在田脣做个相框裡肚个相片，實在有罅靚。這向堵好有一坵田還當在該割禾，紅色个割禾機在田肚緊行緊割，三、四儕人在脣項搵手，歡喜个做到無閒泊杈；割禾機後背跔歸陣个白鶴仔，有兜低頭絡食、有兜大步尋食、有兜飛高飛低搶食，鬧熱煎煎，這就係禾田肚盡有生命力个畫面咧啦！

車仔慢慢仔溜入莊頭，伏在路脣个老狗牯看著車仔來，伸懶筋企起來拂尾，就像係迎接老朋友樣仔。一個著花衫个老伯姆跔在屋面前个菜園摘菜，菜園分屋仔蔭等、日頭還吉會晒著，青荷荷个菜葉面還承等露水，看來當萋、當錫人食樣仔。兩個國小年紀个細阿俵仔，一儕定定仔踏等自行車，一儕半行半走、手項拗等籃球，兩儕嘻嘻哈哈有講有笑愛共下去打球仔。這一路个光景，實在分人心情舒爽。

主人家款好一桌點心、番豆同瓜子，還有清香个高山烏龍茶，三、四個真久無見面个老朋友，天南地北講到毋知天合地。茶香、情醜，靚靚个日頭、靚靚个心情，這就係簡單个幸福。

¹ 手攘腳踏：音 su` ngiong` giog` tab；手、腳舞動跳躍。形容非常高興喜悅的樣子。

【特別个水煎包】曾俊鑾原作

水煎包這種傳統點心滿哪仔都看得著，臺灣个水煎包大體係包玻璃菜个，毋過當好運，佢在學校食過一種特別个水煎包。

下晝三點過後日頭轉影¹，天時較涼哩，下課同學會湊等去打籃球，成下仔會看著，一個背痾痾个外省老阿伯企在側角。佢拗等一隻籃仔，當像驚人知樣仔，把守一隻無法度講个秘密，佢出現个時節總係看東看西，等佢兜行前去，正細心細意掀開蒙在籃仔頂背个布仔，係一籃正起鑊無幾久還燒爇爇仔个水煎包。

佢兜當當在該轉骨²，做儘像飯豚仔³樣仔，到下晝早就枵到肚屎憑背囊哩，逐儕歡喜塵天撈錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換佢請你，好無？」兩下半，本成疊到錐錐个水煎包就分人拿忒兩三層。

水煎包下背墊張紙，佢兜連洗手都懶，五支手指頭托等，開

嘴就齧⁴落去，當像毋會爇人樣仔，緊呵緊講：「好食！好食！」水煎包有較赤⁵，老阿伯盡周到，既經薄薄仔先掌過辣油，佢个水煎包係正宗上海、蘇州个江南口味，豬肉做个料仔，摻等雞卵、蔥仔、香油、鹽這兜配料，係講若个嘴罈精，你還食得出有搯到綿綿个薑嫲，毋敢食辣个同學，乜試著好食。

佢兜緊食緊摻隔壁球場个人攞手，摻食到伸半隻个水煎包拿到高高，喊佢兜愛買就愛趕緊，機會難得，過忒這滿，下二滿毋知愛等到哪時。結果，佢兜做儘分好食个水煎包錫錫過來，連平常較有規矩个細妹仔乜湊陣走等過來，老阿伯个嘴角慢慢仔有一息仔笑。

毋過，一陣嘩嘩仔聲就像風馳雨⁶，摻這場正開始鬧熱个生理打到浪浪散，高中部个教官仔行過來哩，佢本成就面逼逼，這下還較像牛頭馬面，大自家走到尾瀉屎，外省老阿伯乜摻籃仔攞起來，恬恬行往出，對哪搭仔出現，就對哪搭仔毋見忒去。

單淨水煎包个味緒還留在佢兜个嘴角。

¹ 日頭轉影：音 ngid` teu` zon` iang`；日影偏斜。

² 轉骨：音 zon` gud`；指兒童體格發育為成人體格的過渡階段。

³ 飯豚仔：音 fan tun` e`；指將到青春期末紀食量特別大的人。

⁴ 齧：音 sen；咬。

⁵ 赤：音 cag`；黃褐色，喻煎得表皮焦黃。

⁶ 風馳雨：音 fung` cii` i`；西北雨。

【老屋下个風景】蕭瑞琪原作

半晝邊，轉去老屋下遶遶啊。一行入屋裡背，阿爸坐在矮凳仔、報紙放在矮桌仔頂，棚等目鏡在該看國家大事；阿姆坐在竹椅、腳架在細矮圓凳，目聚聚仔看等家庭副刊。日花仔對窗仔斜斜晟入屋肚恬靜恬靜，眠在桌頂頂个烏貓仔兩隻腳還擡等報紙在該睡目，分吾个打門聲嚇一下，擘開目珠懶懶个看過來，又眠轉去繼續睡厥目。

老屋下有三隻貓仔，全都係路脣拈來个。該當時還係細貓子，正開目¹無幾日，分人用紙箱仔裝等囤在路脣草墩頂。阿爸散步經過，聽著細細聲个喵！喵！喵，正發現這兜衰過个細貓子。阿爸同細貓子帶轉屋下，倒一息仔牛乳在盤仔，細貓子鼻著牛乳味，搖搖擺擺行到盤仔脣，用厥幼幼仔个舌嫵緊舐，牛乳還膏到厥鬚鬚頂變白鬚仔，當得人惜。三隻貓子个毛色無共樣，一隻像乳牛一跡烏一跡白，尤其四隻腳个腳趾頭前白白，當像著白襪樣仔，就同佢安名「細白襪」；另外一隻全身係烏金烏金个長毛，就喊佢「長毛仔」；還有一隻生著柑仔色，又有一浪一浪个花

紋，就安到「細柑仔」。毋過阿姆無恁大神氣記佢兜个名仔，就喊佢兜「花花个」、「長毛个」、「黃黃个」。

細貓仔日見日大，變到活跳个大貓仔，不時會自家打開窗門走出去野上野下，等到野癢吔又對窗門鑽入來。貓仔本成就係貓科動物，同獅仔共樣有打獵个本等，雖然經過吔一萬年个馴化，毋過厥本能還無完全消失。故所，佢兜暗晡頭時常會走出去捉老鼠仔、透地龍、壁蛇轉來放在門頭前；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣過个禾鷄仔、斑鳩仔、月鴿仔畀打下來。

這駁仔轉去老屋下，總會看著三隻貓仔目絲絲仔在該啄目睡，阿姆講：「這兜貓仔老吔喲，毋多好出去寮吔，每日眠在屋肚睡目。」係照貓仔个年紀來算，佢兜也係高齡貓吔，逐朝晨兩個看報紙个老人家同三隻啄目睡个老貓仔就係老屋下个風景。

¹ 開目：音 koi' mug`；動物初次張開眼睛。